



# **Statüts da la Società da chatschaders, secziun TASNA**

secziun da  
l'uniun grischuna da chatschaders da patentà (UGCP)

*Confuorm al princip d'egualità da drets dad hom e duonna valan tuottas denominaziuns da persunas e funcziuns da quist documaint, adonta da la fuorma masculina o feminina ütìlisada, per amenduos schlattas.*

**art. 1**

Nom e sez

Cul nom „secziun Tasna“ exista üna società (in seguit nomnà secziun) i'l sen da l'art. 60 ss. CCS (Cudesch civil svizzer). Il sez as rechatta al lö da domicil dal president.

**art. 2**

Mera

La secziun ha per mera da promover ils interess da la chatscha in general sco eir da la chatscha da patenta impustüt sül territori dals cumüns d'Ardez, Guarda e Lavin e da s'impegnar per l'execuziun d'üna buna, reglada chatscha da patenta.

Cun animar e sustgnair masüras chi servan al mantegnimaint, a l'amegl dramaint ed a la protecziun dal spazi da viver da la sulvaschina, tras chüra ed eir tras üna chatscha adattada, dess il nomer da la sulvaschina gnir adattà al spazi da viver local.

**art. 3**

Commembranza  
illa UGCP

La secziun es commember da l'uniun grischuna da chatschaders da patenta (UGCP) sco eir dal district IX da l'UGCP.

#### art. 4

Mezs

Per perseguitar ed accumplir la mera da la secziun, dispuonna la secziun da las contribuziuns da secziun chi vegnan pajadas da seis commembers. Las contribuziuns vegnan fixadas minch'on da la radunanza da secziun.

Cun excepziun dals commembers libers pajan tuot ils commembers la contribuziun da secziun.

Insembel culla contribuziun da secziun, inchascha la suprastanza pro'ls „commembers A“ implü la contribuziun per l'UGCP, chi' es gnüda francada da la radunanza da delegiats da l'UGCP. Quista part transferischa la secziun a l'UGCP.

Implü inchascha la secziun, pro tuot seis commembers chi han abunà il „chatschader grischun“ sur la secziun, la contribuziun d'abunamaint e tilla transferischa a l'UGCP.

La contribuziun per l'adöver da l'implant da tir Urezzas vegn inchaschada da tuot ils commembers, cun excepziun dals commembers passivs e dals fauturs. Ils candidats pajan – pro lur entrada illa secziun – üna contribuziun d'investiziun unica per l'implant da tir Urezzas. Quistas contribuziuns vegnan transferidas a la società Urezzas.

## art. 5

### Commembranzas

Commembers activs (commembers A, commembers B, commembers libers e candidats) da la secziun sun persunas natüralas. Commembers passivs obain fauturs da la secziun sun persunas natüralas o persunas giuridicas. La secziun disferenzchescha las seguintas commembranzas:

#### Commembers A:

Commembers A han dret da vuschar e dret da tschernas. Quai in tuot ils affars. Els sun in dovair da pajar las contribuziuns tenor art. 4. La secziun es in dovair da pajar per els la contribuziun da l'UGCP. Commember A po dvantar minch'ün chi ha il dret d'ir a chatscha in Grischun. Ils organs da guardgiachatscha dal chantun Grischun vegnan trattats sco sch'els vessan il dret d'ir a chatscha.

#### Commembers B:

Commembers B sun commembers chi sun fingià commembers A in ün'otra secziun da l'UGCP. Ils commembers B nun han ingün dret da vuschar e da tschernas per affars chi pertoccan l'UGCP. Els han però il dret da vuschar e da tschernas per affars da la secziun. Els sun in dovair da pajar las contribuziuns tenor art. 4.

#### Commembers libers:

Commembers chi raggiundschan il 75avel on da naschentscha e chi d'eiran sainza interrupziun d'ürant ils ultims 25 ons commembers A d'üna secziun da l'UGCP, dvaintan commembers libers. La secziun nu sto plü pajar per els la contribuziun a l'UGCP. Els giodan dal rest tuot ils drets e tuot ils dovairs d'ün commember A. Commembers libers sun deliberats da pajar la contribuziun da la secziun, els pajan però la contribuziun per l'abunamaint dal chatschader grischun sco eir la contribuziun per l'adöver da l'implant da tir Urezzas.

#### Candidats:

Persunas chi s'han annunzchadas in Grischun per l'examen da chatscha, daschan gnir tuttas sü illa secziun sco candidats. In affars da l'UGCP nun han els ingün dret da vuschar e da tschernas. La secziun nu sto pajar per els ingüna contribuziun a l'UGCP. Appaina ch'els han fat ils examens da chatscha cun succes ed han uschè il dret d'ir a chatscha, valan els sco commembers A. Ils candidats sun in dovair da pajar la contribuziun tenor art. 4.

#### Commembers passivs e fauturs:

La secziun po surdar la commembranza a persunas chi nun han il dret d'ir a chatscha in Grischun. Ellas pon gnir tuttas sü illa secziun sco commembers passivs obain sco fauturs.

Ils commembers passivs ed il fauturs nun han, per affars da l'UGCP, ingün dret da vuschar e da tschernas ed els nun han da pajar ingüna contribuziun per l'UGCP. Els pon abunar il „chatschader grischun“ sur la secziun.

**art. 6**

Admissiun

Dumondas d'admissiun per d'vantar commember sun d'inoltrar in scrit, cun indichar las persunalias, al president da la secziun. Davart l'admissiun decida la radunanza da secziun. Scha l'admissiun da la commembranza A vegn refüsada da la radunanza da secziun, schi po gnir inoltrà – infra 30 dis daspö la cugnoschentscha dal refüs – recuors in scrit pro la suprastanza centrala da l'UGCP. La suprastanza centrala da l'UGCP decida definitivmaing.

**art. 7**

Scadenza da la commembranza/  
exclusiun

La commembranza scrouda cun sortida, exclusiun tras la radunanza da secziun, exclusiun tras la suprastanza centrala da l'UGCP obain cun mortori. La sortida ha da gnir annunzchada a la suprastanza fin il plü tard 4 eivnas avant la radunanza da secziun.

Cunter ün'exclusiun tras la radunanza da secziun po gnir inoltrà – infra 30 dis daspö la cugnoschentscha dal refüs – recuors in scrit pro la suprastanza centrala da l'UGCP. La suprastanza centrala da l'UGCP decida definitivmaing.

**art. 8**

Organs da la secziun

Ils organs da la secziun sun:

- a) la radunanza da secziun
- b) la suprastanza da secziun
- c) ils revisurs

## art. 9

Il plü ot organ da la secziun es la radunanza da secziun. Üna radunanza ordinaria ha lö minch'on d'urant il prüm quartal da l'on da chalender.

A la radunanza da secziun vegnan invidats tuot ils commembers. Ella vain convocada cun invid personal ed in scrit, 5 dis avant la radunanza e quai cun indichar las tractandas.

La radunanza da secziun tratta, tanter oter, ils seguaints affars:

- a) approvaziun dal protocol
- b) sülla fin da mincha perioda d'uffici tscherna da:
  - la suprastanza
  - ils revisurs
  - ils parsuras da la sulvaschina e duos parsuras da la chüra (per mincha cumün ün)
  - la cumischiun per la stima da las trofease quai adüna per üna perioda d'uffizi da 2 ons.
- c) Tscherna dals delgiats per la radunanza da delegiats da l'UGCP. Els vegnan tschernüts minch'on.
- d) approvaziun e revisiun dals statüts
- e) acceptaziun dal rendaquint e dal rapport da revisiun
- f) acceptaziun dal rapport presidial
- g) acceptaziun dal rapport dal parsura da la chüra da sulvaschina
- h) fixaziun da la contribuziun
- i) propostas a man da la radunanza da delegiats da l'UGCP.

A la radunanza da secziun obtegna mincha commember in affars da secziun, üna vusch. In affars da l'UGCP han unicamaing ils commembers A ed ils commembers libers üna vusch. Las decisiuns vegnan trattas cun majorità simpla. Pro parità da vuschs in dumondas materialas, vala l'affar sco sbüttà. Pro parità da vuschs pro tschernas, vain tratta la büs-cha.

Mincha radunanza convocada seguond uorden es cumpetenta da decider.

## art. 10

La suprastanza da secziun

La suprastanza as cumpuona da:

- a) il president
- b) l'actuar, chi ha la funcziun dal vice-president
- c) il chaschier
- d) il parsura da la chüra da sulvaschina, chi suprastà als parsuras da la chüra da mincha cumün
- e) l'assessur

La suprastanza rapreschainta la secziun invers l'extern e maina ils affars curreints. Ella es cumpetenta d'evader tuot ils affars chi nu sun expressamaing d'evader da la radunanza da secziun ed ella dispuona d'üna somma annuala da frs. 1'000.--.

La suprastanza rapreschainta la secziun a la radunanza districtuala.

La suprastanza es cumpetenta da decider, sch'almain trais commembers sun preschaints. Il suprastant chi maina la sezzüda (president obain vice-president) obtegna – pro parità da vuschs – la vusch da tagl.

## art. 11

Incumbenzas dals suprastants

Ils singuls supratants han – tanter oter – las seguaintas incumbenzas e cumpetenzas:

- a) il president maina las radunanzas e sezzüdas. El es respunsabel cha'ls statüts vegnan observats,
- b) l'actuar/vice-president rimplazza il president in cas d'impedimaint e quai culs istess drets e dovairs. El scriva ils protocols da las radunanzas e da las sezzüdas ed evada la corrispondenza,
- c) il chaschier maina ils affars da la chascha da la secziun e piazza la facultà in möd ch'ella porta fits. Implü maina el la glista da commembers ed es respunsabel per registrar las mutaziuns correspondentas. El es in dovair da consegnar al respunsabel da la suprastanza centrala da l'UGCP las contribuziuns respectivas e da comunicar ad el las mutaziuns dals commembers.
- d) il parsura da la chüra da sulvaschina es respunsabel chi vegnan observats illa secziun ils reglamaints correspondentes da la chüra, saja quai quels chantunals sco eir quels dal district da chüra IX.
- e) l'assessur es la persuna da contact pel implant da tir.

**art. 12**

Ils revisurs  
La radunanza da secziun tscherna, adüna per üna perioda d'uffizi, duos revisurs. Ils revisurs survaglian la contabilità e fan almain üna jada l'on üna controlla.

**art. 13**

Ils parsuras da la chüra  
Ils parsuras da la chüra dals cumüns sun in accordanza cul parsura da la chüra da sulvaschina.

**art. 14**

La cumischiun per la stima da trofeas  
La cumischiun per la stima da las trofeas as cumpuona da quatter commembers e d'ün commember da la suprastanza. Ella es respunsabla per üna punctaziun correcta da las trofeas tenor il regalmaint correspondent.

**art. 15**

Suottascripziun  
Il president segna, insembel cun ün ulteriur suprastant, cun suottascripziun collectiva.

**art. 16**

Respunsabilità  
Per debits da la società es unicamaing respunsabla la facultà da la secziun. Üna respunsabilità dals commembers vain esclusa.

**art. 17**

Revisiun dals statüts  
Quists statüts pon gnir reviss, sch'almain 3/4 dals commembers cun dret da vuschar chi sun preschaints a la radunanza da secziun decidan quai. La revisiun sto esser gnida tractandada ordinariamaing.

**art. 18**

Schoglimaint da la secziun  
Il schoglimaint da la secziun po be gnir decis, cun üna majorità d'almain 2/3, scha la majorità dals commembers sun preschaints a la radunanza da secziun.  
Piglian damain da la majorità dals commembers part a la radunanza da secziun, schi sto gnir fatta infra ün mais üna seguonda radunanza da secziun. A quista radunanza da secziun po la secziun gnir scholta cun üna majorità d'almain 2/3, eir schi sun preschaints damain da la majorità dals commembers.  
Cul schoglimaint da la secziun, sto la suprastanza suottametter a la cumischiun sindicatoria da l'UGCP il protocol ed il cudesch da chascha insembel cul rendaquint final per la controlla. In seguit sun da surdar quistas actas insembel culla facultà restanta da la secziun a la suprastanza centrala da l'UGCP.

**art. 19**

Entrada in vigur  
Quists statüts aintran in vigur al mumaint ch'els vegnan approvats da la radunanza da secziun. Els rimplazzan ils statüts dals 27 favrer 2002. Cun sia entrada in vigur sun abolidas tuot las decisiuns da la secziun, chi cuntradischan a quists statüts.



Il president:

L'actuar:

.....

.....

Approvada da la supranza centrala da l'UGCP, als .....

Il president:

L'actuar:

.....

.....